



Broj: 01-50-1-15-15/07

Sarajevo, 26. septembra 2007. godine

Z A P I S N I K

15. sjednice Predstavničkog doma
Parlamentarne skupštine Bosne i Hercegovine,
održane 26. 9. 2007. godine

Sjednica je počela u 10.05 sati. Prisustvovalo je 38 poslanika. Odsustvo su opravdali: Husein Nanić (vidjeti pojašnjenje u prilogu zapisnika), Velimir Jukić, Vinko Zorić i Drago Kalabić.

Iz Vijeća ministara BiH sjednici su prisustvovali ministri Dragan Vrankić i Sredoje Nović, te zamjenici ministara Srđan Arnaut i Fuad Kasumović.

Sjednici su prisustvovali i predstavnici: OHR-a, OSCE-a i Centra za promociju civilnog društva.

Na početku sjednice predsjedavajući Doma Milorad Živković zahvalio se Berizu Belkiću na dosadašnjem uspješnom osmomjesečnom predsjedavanju Domom i poželio mu daljnji uspješan rad.

Zatim je predsjedavajući u uvodnim napomena obrazložio izmjene i dopune u pozivu predloženog dnevnog reda.

U raspravi o prijedlogu dnevnog reda učestvovali su: Denis Bećirović, Azra Hadžiahmetović, Momčilo Novaković, Slavko Matić, Zlatko Lagumdžija i Mirjana Malić.

Denis Bećirović predložio je da se u dnevni red uvrsti Informacija o realizaciji programskih ciljeva sedam političkih stranaka (SNSD, SDA, SBiH, HDZ, HDZ 1990, PDP i NS radom za boljitak) od 3.1.2007., s posebnim osvrtom na definiranje operativnog plana realizacije postignutog sporazuma.

Azra Hadžiahmetović predložila je da se s dnevnog reda skine Informacija o racionalizaciji u DKP mreži Bosne i Hercegovine (predlagač: poslanik Momčilo Novaković), zato što je i Predsjedništvo BiH tražilo odgađanje rasprave o ovom pitanju jer je u toku izrada informacije koja bi bila osnov za raspravu.

Momčilo Novaković je, uz ostalo, rekao da pristaje na skidanje ove tačke uz uslov da se uvrsti u dnevni red naredne sjednice, a ne jedne od narednih, kako stoji u dopisu Predsjedništva BiH.

Slavko Matić predložio je razmatranje i eventualno usvajanje rezolucije o nužnosti povratka u radu na ona pitanja koja se direktno tiču integracijskih procesa kojima teži BiH i racionalizaciji službenih putovanja svih zvaničnika u inozemstvo.

Zlatko Lagumdžija predložio je da se u dnevni red ove ili naredne sjednice uvrsti Informacija Vijeća ministara BiH o realizaciji zaključaka sa 59. i 73. sjednice Doma prethodnog saziva povodom razmatranja prijedloga zaključaka Komisije za ljudska prava, imigraciju, izbjeglice i azil o rezultatima rješavanja predstavke Udruženja decertificiranih policajaca Federacije BiH i Udruženja decertificiranih policajaca Republike Srpske

Mirjana Malić podnijela je inicijativu s prijedlogom da se usvoji u formi odluke, da svi poslanici izdvoje najmanje po 100 KM kako bi se podržala kampanja Asocijacije udruženja za brigu o pacijenticama oboljelim od tumora dojke u BiH.

Nakon rasprave, predsjedavajući je na glasanje dao prvo prijedlog Denisa Bećirovića da se na ovu sjednicu uvrsti prijedlog iznesene tačke.

Prijedlog nije usvojen. "Za" je glasalo 15, "protiv" 19, "suzdržala" su se dva poslanika.

Vezano za Prijedlog Azre Hadžiahmetović za skidanje spomenute tačke, na što je pristao Novaković uz uslov da ide na narednu sjednicu, predsjedavajući Živković konstatirao je da se ova tačka skida i da će biti na dnevnom redu 16. sjednice, sa čim se složila i Azra Hadžiahmetović.

U vezi s prijedlogom Slavka Matića, predsjedavajući je rekao da nisu ispunjeni uslovi iz člana 148. Poslovnika da se prijedlog rezolucije uvrsti na današnju sjednicu, a poslaniku Matiću sugerirao je da tekst rezolucije dostavi Službi kako bi išla u proceduru.

Dalje je predsjedavajući predložio da se tačke koje su predložili Denis Bećirović i Zlatko Lagumdžija uvrste u dnevni red 16. sjednice kako bi se pribavili potrebni materijali.

Poslanici su se, bez glasanja, složili s ovim prijedlogom.

Vezano za prijedlog Mirjane Malić, predsjedavajući je rekao da će se ova inicijativa uputiti nadležnoj komisiji (vjerovatno Zajedničkoj komisiji za ljudska prava...), da razmotri ovu inicijativu i predloži način postupanja.

Beriz Belkić saglasio se sa iznesenom procedurom, ali je dodao da je individualna odluka svakog pojedinca ako želi da pomogne spomenutu akciju i da svako može izvršiti uplatu na odgovarajući račun. I Momčilo Novaković saglasio se s mišljenjem Beriza Belkića.

Azra Hadžiahmetović podsjetila je da su svi parlamentarci dobili dopis Asocijacije u kojem je predloženo, između ostalog, da tokom mjeseca oktobra poslanici u javnim nastupima na reveru nose ružičastu vrpču koja je zaštitni znak ove kampanje. Zamolila je Kolegij da razmotri mogućnost da se na narednu sjednicu pozovu predstavnice Asocijacije kako bi i na taj način dali podršku spomenutoj kampanji.

Predsjedavajući Živković konstatirao je da će se inicijativa Mirjane Malić uputiti nadležnoj komisiji, koja će predložiti način pomoći poslanika pacijenticama oboljelim od tumora dojke.

Predsjedavajući je zatim konstatirao da 15. sjednica Predstavničkog doma ima sljedeći

DNEVNI RED

1. Usvajanje zapisnika 13. i 14. sjednice Predstavničkog doma;
2. Poslanička pitanja i odgovori;
3. Izvještaj komisije Kolegija o nastojanju za postizanje saglasnosti o Prijedlogu zakona o poljoprivredi, prehrani i ruralnom razvoju (zakon u prvom čitanju);
4. Izvještaj komisije Kolegija o nastojanju za postizanje saglasnosti o Prijedlogu zakona o vinu, rakiji i drugim proizvodima od grožđa i vina (zakon u prvom čitanju);
5. Izvještaj komisije Kolegija o nastojanju za postizanje saglasnosti o Prijedlogu zakona o zaštiti planova rasporeda integriranih kola (zakon u drugom čitanju);
6. Izvještaj komisije Kolegija o nastojanju za postizanje saglasnosti o Prijedlogu okvirnog zakona o srednjem stručnom obrazovanju i obuci u Bosni i Hercegovini (zakon u drugom čitanju);
7. Izvještaj komisije Kolegija o nastojanju za postizanje saglasnosti o Amandmanu poslanika Milorada Živkovića na Prijedlog zakona o besplatnoj pravnoj pomoći u građanskim stvarima;
8. Izvještaj komisije Kolegija o nastojanju za postizanje saglasnosti o Prijedlogu zakona o izmjenama i dopunama Zakona o carinskoj tarifi (predlagač: Komisija za vanjsku trgovinu i carine (zakon u prvom čitanju);
9. Izvještaj komisije Kolegija o nastojanju za postizanje saglasnosti o Prijedlogu zakona o izmjenama Zakona o carinskoj politici (predlagač: Komisija za vanjsku trgovinu i carine (zakon u prvom čitanju);
10. Izvještaj komisije Kolegija o nastojanju za postizanje saglasnosti o imenovanju ombudsmena Bosne i Hercegovine iz srpskog i bošnjačkog naroda;
11. Izvještaj komisije Kolegija o nastojanju za postizanje saglasnosti o Prijedlogu za imenovanje Mensura Šehagića za člana Komisije za koncesije BiH (predlagač: Vijeće ministara BiH);
12. Izvještaj komisije Kolegija o nastojanju za postizanje saglasnosti o potvrđivanju imenovanja Ljerke Marić za direktora Direkcije za ekonomsko planiranje (prijedlog Vijeća ministara BiH);
13. Izvještaj komisije Kolegija o nastojanju za postizanje saglasnosti o Prijedlogu zaključka poslanika Huseina Nanića povodom razmatranja Informacije Vijeća ministara BiH o realizaciji zaključaka Predstavničkog doma usvojenih uz Zakon o Budžetu institucija BiH i međunarodnih obaveza BiH za 2007. godinu;
14. Izvještaj komisije Kolegija o nastojanju za postizanje saglasnosti o Prijedlogu zaključaka u vezi sa razmatranjem Informacije o stanju i trendovima na tržištu rada BiH od juna 2006. do juna 2007. godine poslanika:
 - Denisa Bećirovića, Zaključak broj 2. pod a) i b),

- Azre Hadžiahmetović,
 - Jerka Ivankovića Lijanovića i
 - Adema Huskića;
15. Izvještaj komisije Kolegija o nastojanju za postizanje saglasnosti o Prijedlogu zaključka poslanika Šemsudina Mehmedovića povodom razmatranja Informacije Ureda za razmatranje žalbi o preduzetim aktivnostima s ciljem prevazilaženja problema u radu Ureda za razmatranje žalbi primjenom pojedinih važećih propisa s prijedlogom zaključaka (materijal od 24. maja i 11. juna 2007. godine);
 16. Zahtjev Vijeća ministara BiH za razmatranje Prijedloga zakona o usvajanju Zakona o izmjenama i dopunama Zakona o krivičnom postupku, po hitnom postupku, u skladu s članom 127. Poslovnika (zakon visokog predstavnika);
 17. Zahtjev Vijeća ministara BiH za razmatranje Prijedloga zakona o usvajanju Zakona o izmjenama i dopunama Zakona o Visokom sudskom i tužilačkom vijeću BiH, po hitnom postupku, u skladu s članom 127. Poslovnika (zakon visokog predstavnika);
 18. Zahtjev poslanika Milorada Živkovića za razmatranje Prijedloga izmjena i dopuna Poslovnika Predstavničkog doma Parlamentarne skupštine BiH po skraćenom postupku, u skladu s članom 126. Poslovnika;
 19. Prijedlog zakona o izmjenama i dopunama Zakona o ministarstvima i drugim organima uprave BiH (drugo čitanje);
 20. Prijedlog zakona o elektronskom pravnom i poslovnom prometu (drugo čitanje);
 21. Prijedlog zakona o imunitetu Bosne i Hercegovine s mišljenjem Ustavnopravne komisije – predlagač: poslanik Niko Lozančić;
 22. Prijedlog zakona o izmjenama i dopunama Zakona o akcizama u BiH – predlagač: Komisija za vanjsku trgovinu i carine (prvo čitanje);
 23. Prijedlog zakona o izmjenama Zakona o carinskoj tarifi BiH – predlagač: Vijeće ministara BiH (prvo čitanje);
 24. Prijedlog zakona o internoj reviziji u institucijama BiH (prvo čitanje);
 25. Izvještaj Ureda za reviziju institucija BiH o izvršenoj reviziji u 2006. godini sljedećih institucija:
 - a) Instituta za standarde, metrologiju i intelektualno vlasništvo BiH,
 - b) Ministarstva vanjske trgovine i ekonomskih odnosa BiH,
 - c) Agencije za nadzor nad tržištem BiH,
 - d) Fonda za povratak BiH,
 - e) Državne agencije za istrage i zaštitu (SIPA),
 - f) Instituta za akreditiranje BiH,
 - g) Agencije za statistiku BiH,
 - h) Agencije za javne nabavke BiH,
 - i) Agencije za rad i zapošljavanje BiH,
 - j) Agencije za sigurnost hrane BiH;
 26. Prijedlog zaključaka Komisije za finansije i budžet povodom Izvještaja o Izvršenju Budžeta institucija BiH i međunarodnih obaveza BiH za 2006. godinu;
 27. Imenovanje članova u zajedničke komisije oba doma radi usaglašavanja identičnog teksta:
 - a) Zakona o Agenciji za predškolsko, osnovno i srednje obrazovanje,
 - b) Okvirnog zakona o predškolskom odgoju i obrazovanju u Bosni i Hercegovini,
 - c) Zakona o radijacijskoj i nuklearnoj sigurnosti u Bosni i Hercegovini.

Ad. 1. Usvajanje zapisnika 13. i 14. sjednice Predstavničkog doma

O zapisnicima nije bilo rasprave.

Glasanje je izvršeno pojedinačno o oba zapisnika. Usvojeni su jednoglasno.

Ad.2. Poslanička pitanja i odgovori

Predsjedavajući je u uvodu upoznao poslanike da je zadužio Službu da napravi pregled poslaničkih pitanja postavljenih zaključno sa 14. sjednicom, s naznakom na koja je pitanja odgovoreno i da su poslanici dobili ovaj pregled. Iz pregleda se vidi da su sa 14. sjednicom postavljena 204 pitanja i da je odgovoreno na 109 pitanja, a da na 95 pitanja još nije odgovoreno.

Zatim je predsjedavajući iznio mišljenje da nije dobra praksa da neki poslanici na sjednici postavljaju tri, pa i do pet pitanja. Uputio je poziv poslanicima da na jednoj sjednici postave samo jedno pitanje, pri čemu se potpitanja moraju odnositi na to pitanje, rekavši da za ovo ima saglasnost Kolegija Doma. Praksa postavljanja više pitanja dovodi u pitanje funkcioniranje ove institucije, rekao je, pored ostalog, predsjedavajući Živković.

Dalje je predsjedavajući Živković rekao da su za ovu sjednicu odgovore dobili poslanici: Denis Bećirović, Rifat Dolić, Sadik Ahmetović, Sefer Halilović i Azra Alajbegović.

Nakon uvodnih napomena koje je dao predsjedavajući na početku ove tačke dnevnog reda, Denis Bećirović javio se radi poslovničke intervencije. Postavio je pitanje predsjedavajućem i Kolegiju – kako će na početku prve tačke dnevnog reda omogućiti poslanicima u Domu da ovu prvu tačku realiziraju u skladu s članom 153. i 154. Poslovnika Doma. Složio se da Dom dobije i pauzu od 10 minuta kako bi on dobio odgovor na ovo pitanje.

Predsjedavajući Živković rekao je da je Kolegij mislio ovu tačku realizirati kao i do sada, ali da zna da poslanik pri postavljanju ovog pitanja misli na televizijski prijenos jer je to poslovnička obaveza. Zatim je obavijestio i Dom o jučerašnjem razgovoru na sjednici Proširenog kolegija vezano za realizaciju Zaključka Doma koji se odnosi na osiguranje televizijskog prijenosa sjednica Doma.

Denis Bećirović prigovorio je što ovom dijelu sjednice ne prisustvuje niko od članova Vijeća ministara BiH te da se praktično nema kome postaviti pitanje, pogotovo ako bi neki poslanik želio tražiti usmeni odgovor.

Slavko Jovičić također je prigovorio što sjednici ne prisustvuje niko iz Vijeća ministara BiH naglasivši da je on i na prethodnim sjednicama o tome govorio. Dodao je da je ovakav ignorantski odnos Vijeća ministara BiH nepodnošljiv i predložio da Dom zauzme stav da se ne raspravlja ni o jednom materijalu čiji je predlagatelj Vijeće ministara BiH ako niko od njih ne prisustvuje sjednici.

U ovim diskusijama predlagana je i pauza, čemu se usprotivio Jozo Križanović, iznijevši mišljenje da se pauzom ništa ne bi riješilo, kao ni odgađanjem razmatranje ove tačke s ove sjednice. Nije prvi put da ovako radimo niti je prvi put da razgovaramo o odgovornosti Vijeća ministara BiH prema Parlamentu, ali će komocija i ignorancija od Vijeća ministara BiH prema Parlamentu, koja je očigledna, biti do tada dok se ovaj dom bude ovako ignorantski ponašao, rekao je, uz ostalo, Križanović.

Predsjedavajući Živković pozvao je poslanike da se u raspravi ograniče na tačku dnevnog reda. Zatim je pozvao Dom da se odredi o tome da li će se raditi u okviru ove tačke bez prisustva članova Vijeća ministara BiH.

Halid Genjac podsjetio je na odredbu člana 153. Poslovnika, rekavši da u toj odredbi ne stoji imperativno da moraju prisustvovati članovi Vijeća ministara BiH, dodavši da, prema tome, Dom ne treba glasati o tome da li će se odgoditi razmatranje ove tačke zato što nisu prisutni članovi Vijeća ministara BiH. Predložio je da se krene s postavljanjem pitanja ako poslanici to žele. Podsjetio je i na odredbu člana 157. po kojoj treba dva puta godišnje sazivati sjednice dijaloškog tipa – poslanici i delegati pitaju - Vijeće ministara BiH odgovara.

Predsjedavajući je, nakon ove rasprave, konstatirao da će se nastaviti realizacija tačke dnevnog reda i bez prisustva članova Vijeća ministara BiH, a da će on ponovo poslati urgenciju Vijeću ministara BiH, kao što je urađeno i poslije 14. sjednice. Upoznao je poslanike da će se u ovom mjesecu sazvati i posebna sjednica o temi: Poslanici pitaju – Vijeće ministara BiH odgovara.

Postavljena su pitanja kako slijedi:

Sadik Bahtić:

Šta je resorno ministarstvo poduzelo i šta će poduzeti radi zaštite interesa BiH u vezi sa izgradnjom mosta Pelješac-kopno u Hrvatskoj, jer je Hrvatska raspisala tender i radovi treba da započnu

polovinom oktobra, na osnovu izvještaja medija? Tražim od resornog ministra i Ministarstva da poduzmu sve neophodne mjere radi zaštite interesa Bosne i Hercegovine.

Slavko Matić:

1. Koji su kriteriji za imenovanje i smjenjivanje veleposlanika Bosne i Hercegovine u inozemstvu te temeljem kojih je kriterija Predsjedništvo BiH prije isteka mandata smijenilo Lidiju Topić, veleposlanicu BiH u Bruxellesu, Dariju Krstićević, veleposlanicu BiH u Austriji, i veleposlanika Miroslava Palametu u Vatikanu? Temeljem kojih su kriterija imenovani novi veleposlanici u Beču, Beogradu i Bruxellesu?

Jozo Križanović:

1. U zadnje dvije-tri godine, u ovom se Domu vodi aktivnost, s manje i više uspjeha, glede izbora teksta državne himne. Evo, došli smo u fazu osnivanja povjerenstva za izbor himne, pa postavljam pitanje Ministarstvu pravde BiH - je li konačno formirano to državno povjerenstvo i ako jeste, kada će utvrditi svoj plan rada i kada se očekuje završetak ovog posla, jer traje dulje od dvije godine?

2. Namjerava li Kolegij Zastupničkog doma konačno poduzeti ozbiljnije mjere kojima bi učinio odgovornijim Vijeće ministara BiH i druga tijela (uprave, zavode i direkcije) u provođenju zaključaka i odluka koje donosi ovaj Dom?

Rifat Dolić:

1. Na osnovu kojih propisa domaćinstva koja se nalaze u pograničnom dijelu BiH prema R Hrvatskoj i koja su prije rata bila priključena na elektroprijenosni sistem R Hrvatske sada ponovno moraju plaćati priključak na elektroprijenosnu mrežu u BiH kao novi potrošači električne energije?

2. Koliki je iznos neiskorištenih certifikata na jedinstvenim računima građana u Federaciji BiH i kakve su daljnje namjere i potezi Federacije BiH u pravcu da vlasnici certifikata, građani BiH, dobiju još jednu mogućnost da upotrijebe svoje neiskorištene certifikate, osim za otkup stanova što im je danas ostalo na raspolaganju?

Branko Dokić:

1. Zašto još uvijek nije i kada će biti otvoren granični prelaz za robni promet Gradina – Jasenovac, između BiH i Hrvatske?

2. Šta će Savjet ministara BiH preduzeti da se ispravi politički neosvijesćena i ignorantska odluka Nacionalne i univerzitetske biblioteke BiH u Sarajevu, po kojoj se mnogim piscima Srbima i Hrvatima pripisuje bosanski kao maternji jezik?

Denis Bećirović:

1. Pitanje predsjedavajćem Vijeća ministara BiH i ministru civilnih poslova: Šta ste konkretno u posljednjih devet mjeseci uradili s ciljem da BiH, napokon, dobije tekst himne kao i sve druge evropske zemlje?

2. Pitanje predsjedavajćem Vijeća ministara BiH: Osjećate li svoj dio političke, moralne i ljudske odgovornosti da prilikom posjeta stranim državama ne znate tekst himne države koju predstavljate i kako kao državni premijer ocjenjujete činjenicu da jedan dio države (entitet Republika Srpska) ima tekst himne, a država BiH nema?

3. Pitanje ministru za ljudska prava i izbjeglice: Šta ste konkretno preduzeli s ciljem oslobađanja državljanina Bosne i Hercegovine Ilije Jurišića, koji se više od četiri mjeseca nalazi u zatvoru u Beogradu, i da li ste do sada posjetili navedenog državljanina BiH kojem je teško ugroženo zdravstveno stanje?"

4. Pitanje predsjedavajućim Predstavničkog doma, Doma naroda i Vijeća ministara BiH: Tražim da se tačno dostave podaci o međunarodnim posjetama u 2007. godini u ime i ispred Parlamentarne skupštine BiH (Predstavnički dom i Dom naroda) i to: rukovodilaca oba doma, članova različitih komisija u oba doma, kao i sva putovanja predsjedavajućeg Vijeća ministara BiH i ministara u Vijeću ministara BiH, sa sljedećim podacima:

- ime i prezime i stranačka pripadnost,

- destinacija na koju se putovalo i efekti posjete,
- finansijski troškovi posjete i dužina trajanja posjete

Snježana Rajilić:

Zbog čega UIO u posljednje dvije godine izrađuje, odnosno razmatra radne verzije zatvaranja ispostave ove uprave u Novom Gradu – Bosanskom Novom, kada se zna da ova uprava, odnosno carinarnica (prije reforme) postoji najmanje 30 godina? Takođe, ona pokriva i dva granična prelaza u Novom Gradu i Kostajnici.

„Obnavljam poslanička pitanja od 29.03. i 12.04.2007. godine, a odnose se na Ministarstvo inostranih poslova i Savjet ministara.

1. Šta Savjet ministara i Ministarstvo inostranih poslova planiraju da preduzmu ili su preduzeli kako bi inicirali rješenje graničnog problema između Republike Hrvatske i Bosne i Hercegovine u dolini rijeke Une?

2. Šta su Savjet ministara i Ministarstvo inostranih poslova preduzeli kako bi se preduprijedilo odlaganje radioaktivnog otpada po Trgovskoj gori – Opština Dvor na Uni, Republika Hrvatska?

Mehmed Suljkanović:

1. Kada će Vijeće ministara BiH obnoviti utvrđene kvote za tarifne oznake 0202309000 koje se odnose na goveđe meso?

Lazar Prodanović:

Od Savjeta ministara BiH, kao privremenog osnivača JPNIO „Službeni list BiH“, zahtijeva se da razmotri i dostavi Komisiji i Predstavničkom domu mišljenje o Izvještaju o finansijskom poslovanju JPNIO „Službeni list BiH“ po godišnjem obračunu za period od 1. januara do 31. decembra 2005. godine i pitanjima koje on obrađuje, kao i mišljenje o Specijalnom izvještaju revizije ove institucije.

2. Od Savjeta ministara BiH traži se da urgentno riješi pitanje pravnog statusa JPNIO „Službeni list BiH“ i uradi Predlog zakona o „Službenom listu BiH.

S obzirom da do danas Savjet ministara BiH nije dostavio nikakvu informaciju, postavljam sljedeće pitanje:

Da li je Savjet ministara BiH preduzeo korake radi realizacije navedena dva zaključka? Ako jeste, treba navesti aktivnosti koje su učinjene do sada, a ako ne, treba navesti zašto nije ništa učinjeno.

Remzija Kadrić:

Iz kojih razloga Vijeće ministara BiH ni do danas nije raspravljalo o Izvještaju Direkcije o prijedlogu plana za implementaciju reforme policijskih struktura u BiH?

Tražim pismeni odgovor samo iz razloga što ne postoji mogućnost za usmeni odgovor na današnjoj sjednici zbog odsutnosti predstavnika Vijeća ministara BiH.

Slavko Jovičić:

Pitanje za Savjet ministara BiH:

Na drugoj sjednici Predstavničkog doma tražio sam da mi sve državne institucije i agencije dostave nacionalnu strukturu zaposlenih u tim organima.

Od Ministarstva inostranih poslova dobio sam odgovor kojim sam samo djelimično zadovoljan. Dakle, ponavljam isto pitanje:

Kada će mi sve državne institucije i agencije dostaviti odgovor o nacionalnoj strukturi zaposlenih?

Drugo pitanje glasi:

Šta je sa svim privilegijama u Savjetu ministara koje neopravdano koriste svi, od sekretarica, pomoćnika, savjetnika i svih drugih.

Tražim da mi dostavite podatke o njihovom voznom parku, vozačima, korišćenju mobilnih telefona, osnivanju raznih komisija, trošenju novca poreskih obveznika kako to njima odgovara i svemu onom što Savjet ministara neopravdano koristi i što potcenjuje ovaj visoki dom.

I na kraju posljednje pitanje:

Kako ćemo mi uticati na bilo koju reformu? Ono što gospodin Bećirović traži za svoj kanton, naravno, i ja tražim za cijeli istočni dio RS, ali od koga to tražiti?

Kako ćemo ih obavezati da prisustvuju sjednicama ovog doma? Da li oni nas zaista toliko potejenjuju i igraju se s nama?

Mirko Okolić:

Tražim od Ministarstva komunikacija i transporta BiH da dostavi „svježu“, detaljnu informaciju u vezi sa međunarodnim Autoputem „Koridor 5c“ sa svih aspekata. Od posljednje informacije prošlo je dosta vremena i od tada nemamo novih informacija o tako važnom privrednom i svakom drugom pitanju.

Azra Alajbegović:

Pitanje Agenciji za sigurnost hrane: Šta je konkretno urađeno u prvih devet mjeseci 2007. godine po pitanju provjere i obezbjeđenja „sigurnosti hrane“ u BiH?

Da li je projekat kvaliteta i sigurnosti hrane uvezan s primarnom zdravstvenom zaštitom stanovništva i kako?

Salko Sokolović:

Specijalno tužilaštvo RS-a odredilo je direktoru Regulatornog odbora za željeznice BiH pritvor u junu ili julu mjesecu 2007. godine. Postavljam pitanje Ministarstvu komunikacija i prometa BiH:

1. Šta je Ministarstvo učinilo znajući naprijed navedeno, tj. da li je pomenuta osoba suspendovana?

2. Zašto je izostala reakcija Ministarstva, iako se znalo da je u sjedištu Odbora u Doboju po ugovoru zaposlen veći broj ljudi, za koje se ne zna šta rade, jer je Ministarstvo Vijeću ministara BiH tek dostavilo novi Pravilnik o sistematizaciji radnih mjesta u Regulatornom odboru za željeznice BiH?

Ad. 3. Izvještaj komisije Kolegija o nastojanju za postizanje saglasnosti o Prijedlogu zakona o poljoprivredi, ishrani i ruralnom razvoju (zakon u prvom čitanju)

Predsjedavajući je podsjetio da u Kolegiju nije postignuta saglasnost o Prijedlogu zakona u prvom čitanju.

U okviru ove tačke diskutirao je Zlatko Lagumdžija. Rekao je da je danas na dnevnom redu prilično duga lista od 16 izvještaja o usaglašavanju i da se radi o vrlo krupnim pitanjima, da je o nekim u Kolegiju postignuta saglasnost, a o nekim nije. Zatražio je da neko iz Kolegija, kao uvod, kaže čime su se rukovodili kad su o nekim pitanjima postigli saglasnost, a o nekim nisu.

Predsjedavajući Živković odgovorio je da poslanik Lagumdžija nije naveo član Poslovnika koji je eventualno prekršen u radu Doma. Dodao je da nije praksa da se komentira ili objašnjava postizanje ili nepostizanje saglasnosti o nekom pitanju, već da se do kraja provede propisana procedura. Ponovio je da o Prijedlogu zakona iz ove tačke nije postignuta saglasnost i proveo glasanje u drugom krugu.

"Za" Prijedlog zakona glasalo je 16, "protiv" sedam, "suzdržala" su se dva poslanika, pri čemu je iz Republike Srpske "protiv" glasalo šest poslanika.

Predsjedavajući je konstatirao da je Prijedlog zakona o poljoprivredi, ishrani i ruralnom razvoju usvojen u prvom čitanju.

Ad. 4. Izvještaj komisije Kolegija o nastojanju za postizanje saglasnosti o Prijedlogu zakona o vinu, rakiji i drugim proizvodima od grožđa i vina (zakon u prvom čitanju)

Ni o Prijedlogu ovog zakona nije bilo saglasnosti u Kolegiju, podsjetio je predsjedavajući, pa je proveo glasanje u drugom krugu.

"Za" su glasala 22, "protiv" četiri, "suzdržanih" nije bilo.

Kako su iz RS-a "protiv" glasala četiri poslanika, predsjedavajući je konstatirao da je Prijedlog zakona usvojen u prvom čitanju.

Ad. 5. Izvještaj komisije Kolegija o nastojanju za postizanje saglasnosti o Prijedlogu zakona o zaštiti planova rasporeda integriranih kola (zakon u drugom čitanju)

Predsjedavajući je podsjetio da nema saglasnosti o Prijedlogu zakona iz ove tačke.

U drugom krugu glasanja "za" je glasao 21 poslanik, "protiv" 10, "suzdržala" su se tri poslanika.

Predsjedavajući je konstatirao da je iz Republike Srpske "protiv" Prijedloga zakona glasalo 10 poslanika, što je dvije trećine iz entiteta, te da Prijedlog zakona o zaštiti planova rasporeda integriranih kola nije usvojen u drugom čitanju.

Ad. 6. Izvještaj komisije Kolegija o nastojanju za postizanje saglasnosti o Prijedlogu okvirnog zakona o srednjem stručnom obrazovanju i obuci u Bosni i Hercegovini (zakon u drugom čitanju)

U Kolegiju nije postignuta saglasnost o Prijedlogu zakona iz ove tačke.

U drugom krugu glasanja "za" je glasalo 20, "protiv" 11, "suzdržala" su se tri poslanika.

Predsjedavajući je konstatirao da je iz Republike Srpske "protiv" Prijedloga zakona glasalo 11 poslanika, što je više od 2/3, te da je Prijedlog zakona pao u drugom čitanju.

Poslije glasanja za riječ se javio Šefik Džaferović. Rekao je da je Dom sada glasao o vrlo važnom zakonu iz oblasti obrazovanja koji se najdirektnije tiče evropskog puta BiH i, što je najvažnije, radi se o zakonu koji je predložio sadašnji saziv Vijeća ministara BiH. Dodao je da se vidi različito postupanje poslanika one parlamentarne grupacije čiji ministri sjede u Vijeću ministara BiH i predlažu zakone.

Predsjedavajući Živković rekao je da ovo nije u vezi s dnevnim redom ni s glasanjem.

Džaferović je rekao da je ovo želio javno reći te da će iz ovoga za sebe izvlačiti određene zaključke.

Ad. 7. Izvještaj komisije Kolegija o nastojanju za postizanje saglasnosti o Amandmanu poslanika Milorada Živkovića na Prijedlog zakona o besplatnoj pravnoj pomoći u građanskim stvarima

Predsjedavajući je podsjetio da o amandmanu koji na prošloj sjednici nije dobio entitetsku većinu provedeno usaglašavanje u Kolegiju i da je postignuta saglasnost. Zatim je proveo glasanje o amandmanu u skladu s članom 79. Poslovnika. Amandman ponovo nije dobio entitetsku većinu ("za" glasalo 18 - Federacija BiH osam, RS 10, "protiv" 13, "suzdržao" se jedan poslanik.

Odmah je provedeno usaglašavanje u Kolegiju i nije bilo saglasnosti. U drugom krugu glasanja "za" amandman je glasalo 15, "protiv" 15.

Predsjedavajući je konstatirao da amandman nije usvojen, pa je na glasanje dao Prijedlog zakona u drugom čitanju.

"Za" Prijedlog zakona glasala su 23 (Federacija BiH 20, RS tri), "protiv" šest, "suzdržalo" se pet poslanika.

Zbog nedostatka entitetske većine odmah je izvršeno usaglašavanje u Kolegiju kao komisiji. Nije bilo saglasnosti.

U drugom krugu glasanja "za" Prijedlog zakona glasala su 22, "protiv" 10, "suzdržala" su se dva, pri čemu je iz Republike Srpske "protiv" bilo 10.

Predsjedavajući je konstatirao da ni ovaj zakonski prijedlog nije usvojen u drugom čitanju.

Ad. 8. Izvještaj komisije Kolegija o nastojanju za postizanje saglasnosti o Prijedlogu zakona o izmjenama i dopunama Zakona o carinskoj tarifi (predlagač: Komisija za vanjsku trgovinu i carine (zakon u prvom čitanju)

Nije postignuta saglasnost u Kolegiju o Prijedlogu zakona iz ove tačke.

U drugom krugu glasanja "za" su glasala 22, "protiv" osam, "suzdržala" su se tri poslanika. Iz Republike Srpske "protiv" je glasalo osam poslanika, što je manje od dvije trećine.

Predsjedavajući je konstatirao da je Prijedlog zakona iz ove tačke usvojen u prvom čitanju.

Ad. 9. Izvještaj komisije Kolegija o nastojanju za postizanje saglasnosti o Prijedlogu zakona o izmjenama Zakona o carinskoj politici (predlagač: Komisija za vanjsku trgovinu i carine (zakon u prvom čitanju)

Također nije bilo saglasnosti u Kolegiju.

U drugom krugu glasanja "za" su glasala 23, "protiv" sedam, "suzdržala" su se četiri poslanika.

Kako je iz RS-a u drugom krugu "protiv" glasalo sedam poslanika, predsjedavajući je konstatirao da je i Prijedlog zakona iz ove tačke usvojen u prvom čitanju.

Ad. 10. Izvještaj komisije Kolegija o nastojanju za postizanje saglasnosti o imenovanju ombudsmena Bosne i Hercegovine iz srpskog i bošnjačkog naroda

Predsjedavajući Živković podsjetio je na Izvještaj o usaglašavanju i da je u Kolegiju postignuta saglasnost, te da se ide ponovo na glasanje u skladu s članom 79. Poslovnika.

Nije bilo rasprave.

Dom se prvo izjasnio o imenovanju Vitomira Popovića za ombudsmena.

"Za" je glasalo 12, "protiv" 20, "suzdržala" su se dva poslanika.

Zatim se Dom izjasnio o Emini Halilović.

"Za" je glasalo devet, "protiv" 17, "suzdržalo" se sedam poslanika.

Predsjedavajući Živković konstatirao je da nijedan kandidat nije dobio podršku Doma, da nemamo instituciju ombudsmena i da slijedi novi konkurs.

Ad. 11. Izvještaj komisije Kolegija o nastojanju za postizanje saglasnosti o Prijedlogu za imenovanje Mensura Šehagića za člana Komisije za koncesije BiH (predlagač: Vijeće ministara BiH)

U Kolegiju je postignuta saglasnost o prijedlogu za imenovanje Mensura Šehagića za člana Komisije za koncesije BiH.

U ponovnom glasanju "za" su glasala 24 (FBiH 15, RS devet), "protiv" devet, "suzdržao" se jedan poslanik.

Predsjedavajući je konstatirao da je Mensur Šehagić imenovan za člana Komisije za koncesije BiH.

Ad. 12. Izvještaj komisije Kolegija o nastojanju za postizanje saglasnosti o potvrđivanju imenovanja Ljerke Marić za direktora Direkcije za ekonomsko planiranje (prijedlog Vijeća ministara BiH)

Također je postignuta saglasnost, pa je izvršeno glasanje u skladu s članom 79. Poslovnika.

"Za" je glasalo 20 (Federacija BiH 15, RS pet), "protiv" devet, "suzdržala" su se tri poslanika.

Predsjedavajući je konstatirao da je Dom potvrdio Odluku Vijeća ministara BiH o imenovanju Ljerke Marić za direktora Direkcije za ekonomsko planiranje.

Ad. 13. Izvještaj komisije Kolegija o nastojanju za postizanje saglasnosti o Prijedlogu zaključka poslanika Huseina Nanića povodom razmatranja Informacije Vijeća ministara BiH o realizaciji zaključaka Predstavničkog doma usvojenih uz Zakon o Budžetu institucija BiH i međunarodnih obaveza BiH za 2007. godinu

Nakon što u Kolegiju nije postignuta saglasnost, predsjedavajući je o prijedlogu zaključka proveo glasanje u drugom krugu. "Za" je glasalo 25, "protiv" sedam, "suzdržala" su se dva poslanika.

Predsjedavajući je konstatirao da je iz RS-a "protiv" glasalo sedam, što je manje od 2/3, pa je, prema tome, povodom razmatranja Informacije Vijeća ministara BiH o realizaciji zaključaka Predstavničkog doma usvojenih uz Zakon o Budžetu institucija BiH i međunarodnih obaveza BiH za 2007. godinu, usvojen zaključak koji glasi:

Predstavnički dom BiH zadužuje Vijeće ministara BiH da pripremi i u parlamentarnu proceduru u roku od 30 dana uputi prijedlog zakona kojim će se utvrditi kriteriji za osnivanje komisija i drugih radnih tijela iz nadležnosti Vijeća ministara BiH, ministarstava i institucija Bosne i Hercegovine.

Ad .14. Izvještaj komisije Kolegija o nastojanju za postizanje saglasnosti o Prijedlogu zaključaka u vezi sa razmatranjem Informacije o stanju i trendovima na tržištu rada BiH od juna 2006. do juna 2007. godine poslanika:

- Denisa Bećirovića, Zaključak broj 2. pod a) i b),
- Azre Hadžiahmetović,
- Jerka Ivankovića Lijanovića i
- Adema Huskića

Predsjedavajući je podsjetio poslanike na izvještaje o usaglašavanju o prijedlozima zaključaka iz ove tačke i rekao da nije postignuta saglasnost o prijedlozima zaključaka Denisa Bećirovića, Azre Hadžiahmetović i Jerka Ivankovića Lijanovića, a da je postignuta saglasnost o prijedlogu zaključka Adema Huskića.

Provedeno je glasanje u drugom krugu o zaključcima za koje nije postignuta saglasnost.

- Zaključak Denisa Bećirovića nije usvojen ("za" glasalo 20, "protiv" 11, "suzdržana" dva – iz RS-a 10 "protiv").
- Zaključak Azre Hadžiahmetović također nije usvojen ("za" glasala 23, "protiv" 10, "suzdržan" jedan – iz RS-a "protiv" 10).
- Zaključak Jerka Ivankovića Lijanovića usvojen je ("za" glasalo 19, "protiv" 11, "suzdržana" tri – iz RS-a devet "protiv", što je manje od 2/3. Sadržaj ovog zaključka je sljedeći:

Zadužuje se Vijeće ministara BiH da osigura uslove u kojima će se stopa nezaposlenosti smanjivati za 0,5% mjesečno i da o rezultatima smanjenja nezaposlenosti izvještava Predstavnički dom Parlamentarne skupštine BiH svaka tri mjeseca.

O prijedlogu zaključka Adema Huskića izvršeno je glasanje u skladu s članom 79. Poslovnika.

"Za" je glasalo 19 (Federacija BiH 17, RS dva), "protiv" šest, "suzdržalo" se devet poslanika.

Predsjedavajući je konstatirao da prijedlog zaključka Adema Huskića nije dobio entitetsku većinu i da ponovo slijedi usaglašavanje u Kolegiju kao komisiji.

Ad .15. Izvještaj komisije Kolegija o nastojanju za postizanje saglasnosti o Prijedlogu zaključka poslanika Šemsudina Mehmedovića povodom razmatranja Informacije Ureda za razmatranje žalbi o preduzetim aktivnostima s ciljem prevazilaženja problema u radu Ureda za razmatranje žalbi primjenom pojedinih važećih propisa s prijedlogom zaključaka (materijal od 24. maja i 11. juna 2007. godine)

Predsjedavajući je rekao da je u Kolegiju postignuta saglasnost o prijedlogu zaključaka koje je podnio Šemsudin Mehmedović, pa je proveo glasanje u skladu s članom 79. Poslovnika.

"Za" su glasala 22 (Federacija BiH 16, RS šest), "protiv" pet, "suzdržalo" se sedam poslanika.

Predsjedavajući je konstatirao da su usvojeni zaključci. Sadržaj zaključaka je sljedeći:

1. Zadužuje se Komisija za finansije i budžet da ponovo razmotri materijale od 23. maja, 11. jula i 31. jula 2007. godine koje je Ured za razmatranje žalbi dostavio Predstavničkom domu Parlamentarne skupštine BiH i da vodeći računa o odredbama Zakona o javnim nabavkama BiH otkloni nedostatke u Mišljenju o Informaciji Ureda za razmatranje žalbi o preduzetim aktivnostima na prevazilaženju problema u radu Ureda za razmatranje žalbi i planu mjera za prevazilaženje organizacionih problema s

prijedlogom zaključaka Komisije za finansije i budžet od 26. 7.2007., uz obavezu da predstavniku Ureda za razmatranje žalbi omogući učešće u radu Komisije za finansije i budžet.

2. Zadužuje se Komisija za finansije i budžet da po okončanju aktivnosti iz tačke 1. dostavi Predstavničkom domu Parlamentarne skupštine BiH jedinstveno Mišljenje o svim materijalima Ureda za razmatranje žalbi od 23. maja, 11. jula i 31. jula 2007. godine s prijedlogom zaključaka Komisije za finansije i budžet.

Ad. 16. Zahtjev Vijeća ministara BiH za razmatranje Prijedloga zakona o usvajanju Zakona o izmjenama i dopunama Zkona o krivičnom postupku, po hitnom postupku, u skladu s članom 127. Poslovnika (zakon visokog predstavnika)

Poslije uvodnih napomena predsjedavajućeg, u okviru ove tačke u raspravi su učestvovali: Zlatko Lagumdžija, Šefik Džaferović, Branko Dokić, Beriz Belkić, Sadik Ahmetović, Hadži Jovan Mitrović, Momčilo Novaković i Selim Bešliagić,

Zamjenik ministra pravde Srđan Arnaut obrazložio je zahtjev za hitni postupak, kao i Prijedlog zakona.

Poslije rasprave, Dom je prvo usvojio zahtjev za hitni postupak – sa 27 glasova "za" (Federacija BiH 20, RS sedam), četiri "protiv" i tri "suzdržana".

Zatim je, sa 28 glasova "za" (Federacija BiH 20, RS osam), četiri "protiv" i tri "suzdržana", usvojen Zakon iz ove tačke.

Ad. 17. Zahtjev Vijeća ministara BiH za razmatranje Prijedloga zakona o usvajanju Zakona o izmjenama i dopunama Zakona o Visokom sudskom i tužilačkom vijeću BiH, po hitnom postupku, u skladu s članom 127. Poslovnika (zakon visokog predstavnika)

Nije bilo rasprave.

Sa 27 glasova "za" (Federacija BiH 19, RS osam), četiri "protiv" i tri "suzdržana", usvojen je zahtjev za hitni postupak.

Zakon je usvojen sa 26 glasova "za" (Federacija BiH 18, RS osam), pet "protiv" i tri "suzdržana".

Ad. 18. Zahtjev poslanika Milorada Živkovića za razmatranje Prijedloga izmjena i dopuna Poslovnika Predstavničkog doma Parlamentarne skupštine BiH po skraćenom postupku, u skladu s članom 126. Poslovnika

U svojstvu predlagача izmjena i dopuna Poslovnika, Milorad Živković ukratko je podnio obrazloženje.

U raspravi su učestvovali: Jozo Križanović, Bakir Izetbegović, Šefik Džaferović, Beriz Belkić, Milorad Živković i Ekrem Ajanović.

U raspravi su izneseni prijedlozi da se osnuje radna grupa u oba doma i da se na taj način pristupi pripremi izmjena i dopuna Poslovnika.

Bakir Izetbegović skrenuo je pažnju da je iznio konkretan prijedlog zaključka – da se osnuje zajednička ad hoc radna grupa oba doma koja bi u svoj rad uključila i poziciju i opoziciju, i pripremila izmjene i dopune Poslovnika, te da će on taj prijedlog napisati.

Poslije rasprave predsjedavajući Doma Milorad Živković rekao je da se ispostavio problem tehničke prirode, a to je da li će se prvo glasati o prijedlogu iz rasprave za osnivanje ad hoc radne grupe – koji nije dostavljen u pisanoj formi, ili da se glasa o zahtjevu za skraćeni postupak koji je na dnevnom redu. Dalje je rekao da je Kolegij saglasan da se glasa o zahtjevu za skraćeni postupak. Zatim je zahtjev dao na glasanje.

"Za" je glasalo 15, "protiv" 17, "suzdržala" su se tri poslanika.

Predsjedavajući je konstatirao da nije usvojen zahtjev da se Prijedlog izmjena i dopuna Poslovnika Predstavničkog doma razmatra o skraćenom postupku, te da će se razmatrati u redovnoj proceduri. Rekao je da predlagачi osnivanja radne grupe mogu dostaviti inicijativu u formi zaključka o osnivanju ad hoc komisije.

Nakon glasanja izraženo je negodovanje što nisu uzeti u obzir prijedlozi izneseni u raspravi, pa je Klub SDA zatražio pauzu.

Poslije pauze Bakir Izetbegović rekao je da se Dom treba izjasniti o prijedlozima iz rasprave.

Predsjedavajući je zatim rekao da je u raspravi Jozo Križanović iznio prijedlog zaključka o kojem je Kolegij postigao saglasnost, ali bi i Dom o tome trebalo da se izjasni, a to je da u proceduri razmatranja izmjena i dopuna Poslovnika amandmansko djelovanje neće biti ograničeno samo na članove Poslovnika koji su u Prijedlogu izmjena i dopuna, već će biti omogućeno da se djeluje i na druge odredbe Poslovnika. S obzirom da je Prijedlog izmjena i dopuna Poslovnika već u proceduri, omogućilo bi se djelovanje i na druge članove, o čemu su govorili poslanici, rekao je Živković. Skrenuo je pažnju da je Džaferović u diskusiji rekao da Ustavnopravna komisija smatra da se ne mogu davati amandmani na bilo koji drugi član osim na one koji su u Prijedlogu izmjena i dopuna određenog akta, dodao je predsjedavajući, pa je otvorio raspravu o ovom pitanju.

Šefik Džaferović je u daljnjoj raspravi rekao da je ovakav prijedlog suprotan Jedinostvenim pravilima za izradu pravnih propisa u institucijama BiH, koji je i ovaj dom usvojio. Pravi put je da se sastanu stručni ljudi, proanaliziraju Poslovnik i Domu podnesu cjelovit prijedlog izmjena i dopuna, naglasio je Džaferović.

Jozo Križanović rekao je da se donošenje Poslovnika u proceduri razlikuje od donošenja i izmjena bilo kojeg zakona, zbog čega i misli da je to jako osjetljivo pitanje i da ga je potrebno detaljno obraditi. Zbog toga smatra da nije nikakav prekršaj ako bi se dala mogućnost ulaganja amandmana i na druge odredbe Poslovnika, rekao je, uz ostalo, Jozo Križanović.

Poslije rasprave predsjedavajući je na glasanje dao prijedlog zaključka Jozе Križanovića, koji glasi:

„U proceduri razmatranja prijedloga izmjena i dopuna Poslovnika Predstavničkog doma Parlamentarne skupštine BiH amandmansko djelovanje neće biti ograničeno samo na prijedlog nego će biti omogućeno predlaganje popravki cijelog Poslovnika“.

"Za" ovaj prijedlog zaključka glasalo je 19 (Federacija BiH 15, RS četiri), "protiv" je glasalo devet, "suzdržala" su se tri poslanika.

Predsjedavajući je konstatirao da prijedlog zaključka nije dobio entitetsku većinu, pa će se provesti usaglašavanje.

Dalje je predsjedavajući konstatirao da je Klub SDA dostavio prijedlog da se osnuje ad hoc radna grupa sastavljena od predstavnika pozicije i opozicije iz oba doma, koja će predložiti izmjene i dopune poslovnika Predstavničkog doma i Doma naroda Parlamentarne skupštine BiH. Rekao je da ga je sekretar Doma upozorila da je, u skladu s članom 29. Poslovnika, potrebno da osnivanje ad hoc radne grupe bude tačka dnevnog reda, pa da bi to trebalo uvrstiti na narednu sjednicu Doma. Pitao je Klub SDA da li žele da se sada glasa o prijedlogu zaključka, koji bi mogao da padne zbog iznesenog upozorenja, ili će ga predložiti u dnevni red naredne sjednice.

Bakir Izetbegović obavijestio je da povlači zahtjev za glasanje o predloženom zaključku na ovoj sjednici.

Ovim je zaključena ova tačka dnevnog reda.

Ad. 19. Prijedlog zakona o izmjenama i dopunama Zakona o ministarstvima i drugim organima uprave BiH (drugo čitanje)

U uvodnim napomenama predsjedavajući Živković rekao je da je nadležna komisija Prijedlog zakona prihvatila u predloženom tekstu i da nije bilo amandmana.

Sa 20 glasova "za" (Federacija BiH 14, RS 13) i šest "suzdržanih", usvojen je Zakon u drugom čitanju.

Ad. 20. Prijedlog zakona o elektronskom pravnom i poslovnom prometu (drugo čitanje)

U uvodnim napomenama predsjedavajući je podsjetio na Izvještaj nadležne komisije, da je Komisija prihvatila ispravke koje je resorno ministarstvo dostavilo, te da nije bilo amandmana.

Momčilo Novaković zatražio je razjašnjenje za određena pitanja.

Pomoćnik ministra Kojo Koprivica odgovorio je na pitanja Novakovića.

Poslije kraće rasprave Novakovića i Koprivice, predsjedavajući je Prijedlog zakona dao na glasanje.

Sa 28 glasova "za" (Federacija 19, RS devet) i pet "suzdržanih", usvojen je Zakon o elektronskom pravnom i poslovnom prometu.

Ad. 21. Prijedlog zakona o imunitetu Bosne i Hercegovine s mišljenjem Ustavnopravne komisije – predlagač: poslanik Niko Lozančić

Predsjedavajući je u uvodnim napomenama skrenuo pažnju da je Mišljenje nadležne komisije o principima negativno i da se na Domu raspravlja i odlučuje o Mišljenju, te ako se Mišljenje prihvati, da je Prijedlog zakona pao.

Niko Lozančić je, u svojstvu predlagača Zakona, iznio obrazloženje.

U raspravi su učestvovali: Šefik Džaferović, Mirko Okolić, Rifat Dolić, Slavko Jovičić, Milica Marković, Bakir Izetbegović, Sefer Halilović, Niko Lozančić i Beriz Belkić.

Poslije rasprave Dom je, sa 20 glasova "za" (Federacija BiH 14, RS šest), osam "protiv" i dva "suzdržana", usvojio Mišljenje Ustavnopravne komisije o principima Prijedloga zakona o imunitetu u BiH, pa je tako i Prijedlog zakona pao.

Na prijedlog Bakira Izetbegovića, Dom je usvojio sljedeći zaključak:

Zadužuje se Interresorna radna grupa za izradu izmjena i dopuna Izbornog zakona BiH, Zakona o sukobu interesa u institucijama vlasti BiH i Zakona o finansiranju političkih stranaka da izradi Prijedlog izmjena i dopuna Zakona o imunitetu BiH, u skladu s praksom u parlamentima zemalja Evropske unije.

Zaključak je usvojen sa 19 glasova "za" (Federacija 14, RS pet), osam "protiv" i dva "suzdržana".

Ad. 22. Prijedlog zakona o izmjenama i dopunama Zakona o akcizama u BiH – predlagač: Komisija za vanjsku trgovinu i carine (prvo čitanje)

Poslije uvodnih napomena predsjedavajućeg, Šemsudin Mehmedović obrazložio je Prijedlog zakona u ime Komisije.

U raspravi je učestvovala Snježana Rajilić. Pored ostalog, kazala je da Komisija kao predlagač nije pribavila mišljenje Uprave za indirektno oporezivanje o ovom zakonskom prijedlogu i da o tome postoji dilema da li mišljenje treba da pribavi Komisija kao predlagač ili da to uradi Kolegij Doma, dodavši da je i inače komunikacija s Upravom za indirektno oporezivanje nešto otežana.

Zatim je izvršeno glasanje o Prijedlogu zakona u prvom čitanju. Za je glasalo 20 (Federacija 18, RS dva) protiv sedam, suzdržala se dva poslanika.

Predsjedavajući je konstatirao da Prijedlog zakona nije dobio entitetsku većinu i da slijedi usaglašavanje u Kolegiju kao komisiji.

Ad. 23. Prijedlog zakona o izmjenama Zakona o carinskoj tarifi BiH – predlagač: Vijeće ministara BiH (prvo čitanje)

Poslije uvodnih napomena Snježana Rajilić je, kao predsjedavajuća nadležne komisije za ovaj zakonski prijedlog, skrenula pažnju da se u proceduri nalaze dva prijedloga zakona o carinskoj tarifi – ovaj i prijedlog Komisije za vanjsku trgovinu i carine, te da se jedan razmatra po skraćenom, a drugi po redovnom postupku. Predložila je da Dom, ako usvoji ovaj zakonski prijedlog u prvom čitanju, donese zaključak da se odrede isti rokovi za oba zakona, kako bi se harmonizirala dva zakonska prijedloga.

U raspravi su učestvovali: Sadik Bahtić, Azra Hadžiahmetović i Jozo Križanović.

Poslije rasprave Dom je, sa 19 glasova "za" (Federacija BiH 12, RS sedam), četiri "protiv" i šest "suzdržanih", usvojio Prijedlog zakona o izmjenama Zakona o carinskoj tarifi BiH u prvom čitanju.

Vezano za prijedlog Snježane Rajilić, predsjedavajući je rekao da misli da nije potrebno da Dom donosi zaključak o rokovima za amandmane jer o tome može odlučiti Kolegij. Skrenuo je pažnju da je Dom usvojio zahtjev Vijeća ministara BiH za razmatranje Prijedloga ovog zakona po skraćenom

postupku, ali da se ipak Komisiji daje mogućnost da Kolegiju podnese zahtjev za produženje roka za amandmansku fazu. Ovim je predsjedavajući zaključio ovu tačku dnevnog reda.

Ad. 24. Prijedlog zakona o internoj reviziji u institucijama Bosne i Hercegovine (prvo čitanje)

Predsjedavajući je dao uvodne uvodne napomene.

Nije bilo rasprave.

Prijedlog ovog zakona usvojen je u prvom čitanju sa 24 glasa "za" (Federacija BiH 15, RS devet), četiri poslanika "suzdržala" su se od glasanja.

Ad. 25. Izvještaj Ureda za reviziju institucija BiH o izvršenoj reviziji u 2006.

godini sljedećih institucija:

- a) Instituta za standarde, mjeriteljstvo i intelektualno vlasništvo BiH,
- b) Ministarstva vanjske trgovine i ekonomskih odnosa BiH,
- c) Agencije za nadzor nad tržištem BiH,
- d) Fonda za povratak BiH,
- e) Državne agencije za istrage i zaštitu (SIPA),
- f) Instituta za akreditiranje BiH,
- g) Agencije za statistiku BiH,
- h) Agencije za javne nabavke BiH,
- i) Agencije za rad i zapošljavanje BiH,
- j) Agencije za sigurnost hrane BiH.

U uvodnim napomenama predsjedavajući je podsjetio na komisijske izvještaje o izvještajima Ureda za reviziju, u kojima su sadržani određeni zaključci i preporuke.

Kratko obrazloženje podnio je predsjedavajući nadležne komisije Sadik Bahtić.

Predsjedavajući Doma zatim je dao na glasanje prijedlog o načinu glasanja o izvještajima.

Sa 22 glasa "za" (Federacija BiH 13, RS devet), jednim "protiv" i šest "suzdržanih", usvojen je prijedlog da se o izvještajima glasa u paketu.

Sa 22 glasa "za" (Federacija BiH 13, RS devet), jednim "protiv" i pet "suzdržanih", usvojeni su izvještaji o reviziji institucija iz ove tačke, sa izvještajima Komisije za finansije i budžet.

Ad. 26. Prijedlog zaključaka Komisije za finansije i budžet povodom Izvještaja o Izvršenju Budžeta institucija BiH i međunarodnih obaveza BiH za 2006. godinu

Poslije uvodnih napomena Dom je, sa 23 glasa "za" (Federacija BiH 14, RS devet) i šest "suzdržanih", na prijedlog Komisije za finansije i budžet, usvojio sljedeći zaključak:

Zadužuje se Komisija za finansije i budžet da u što kraćem roku održi sastanak s predstavnicima Vijeća ministara BiH i Ministarstva finansija i trezora BiH kako bi se razmotrile mogućnosti raspoređivanja ostvarenog akumuliranog viška prihoda,¹ iskazanog u Izvještaju o izvršenju Budžeta institucija BiH za 2006. godinu i utvrdili konkretni prijedlozi rješenja.

O konkretnim prijedlozima Komisija će Domu podnijeti informaciju.

Ad. 27. Imenovanje članova u zajedničke komisije oba doma radi usaglašavanja identičnog teksta:

- a) Zakona o Agenciji za predškolsko, osnovno i srednje obrazovanje,

¹ Prijedlozi zaključaka sa 12. sjednice Komisije

- b) Okvirnog zakona o predškolskom odgoju i obrazovanju u Bosni i Hercegovini i
- c) Zakona o radijacijskoj i nuklearnoj sigurnosti u Bosni i Hercegovini.

U zajedničke komisije oba doma iz Predstavničkog doma imenovani su:

- Za zakone pod a) i b): Halid Genjac, Drago Kalabić i Martin Raguž;
- za Zakon pod c): Lazar Prodanović, Slavko Matić i Ekrem Ajanović.

Ovim je realiziran dnevni red.

Sjednica je završena u 16,40 sati.

Sastavni dio Zapisnika je transkript 15. sjednice.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
dr. Milorad Živković

NAKNADNO POJAŠNJENJE INDOK SEKTORA SEKRETARIJATA PSBIH

Uvidom u dokumentaciju utvrđeno je da je poslanik Husein Nanić prisustvovao 15. sjednici Predstavničkog doma Parlamentarne skupštine Bosne i Hercegovine, održanoj 26.9.2007. U uvodu zapisnika stoji da navedeni poslanik nije bio prisutan. Sjednici nije prisustvovao Adem Huskić, što u Zapisniku nije navedeno.

* * * * *

Napominjemo da Uredništvo web prezentacije Parlamentarne skupštine BiH usvojene zapisnike sa sjednica prezentira u izvornom obliku, bez ikakvih intervencija. Izvinjavamo se onima koji usljed toga trpe neugodnosti bilo koje vrste.